

Asisko gutuna

2016ko Azaroa. 1. printzipioa.

Egunero bilatzea Jainkoarekin harreman pertsonala

97. zenbakia

Asis Sarea eguneroko bizimoduan espiritualtasun frantziskotarra ezagutu edo partekatu nahi duten lagunen sare sozial irekia da.

Jesusek zoriotsu bizitzea bilatzen zuen? Eta hori bilatzen ez bazuen, zer bilatzen zuen? Agian gu geu gara gure zoriontasun bilaketa aztertu behar dugunak, eta Jesusek bezala, ez gurea baizik eta negar egiten dutenena bilatu, ez gure poztasuna baizik pobreena, ez gure ongizatea baizik eta zuzengabekeriak jazarriena. “Bila ezazue Jainkoaren Erreinua eta gainontzekoa gehigarritzat emango zaizue”.

Gogoetarako gaia

Zoriontsu izan

Bizitzan zer nahi duen galdetzen diogun edonork, gutako bakoitza barne, seguru-asko erantzungo du “zoriontsu izan”. Gero beste gauza bat izango da zer ulertzen duen gutako bakoitzak zoriontsu izate horretaz. Batzuentzat izango da beren gogoak betetzea, besteentzat minik ez edukitzea, besteentzat problemarik ez izatea, eta seguru-asko beste batzuentzat, horiez gain, injustizia, gerra, gosea ... mundutik desagertzea.

Baina errealitatea bizitzan ez da horrela izaten, korapiloz bete dago. Desirak ez dira betetzen ia inoiz, arazoak jarraitu egiten dute, geurekin ditugu beldurrak, segurtasun-ezak ... eta injustiziak, gosea, guduak ere ez dira desagertzen; eta horren aurrean zorionik gabe gelditu behar al dugu?

Agian, bizitzako une honetan atzera begiratzea tokatzen zaigu, eta ikusiz joan gauzak ez zaizkigula hain gaizki joan, bizitzako zailtasunak

gora behera. Aurkitu ditugu maite gaituzten pertsonak, topatu dugu maitasuna eta barkamena; ikasiz goaz balioa ematen irribarre bati, gogo ilunetik ateratzen gaituen besarkada bati; ikasi dugu porrotak onartzen eta heldutasunbide gisa ikusten. Zoriona ez ote da horrelako zerbait?

Guduak ez dira bukatu, baina topatzen ditugu bakea eraikitzeko gai diren pertsonak; gosea ez da desagertu, baina badaude pertsona solidarioak, daukatena pobreekin partekatzeko gai direnak; ez da desagertu bidegabekeria, baina badaude nekatu gabe borrokan eta lanean ari diren pertsonak, justizia egunez egun nagusituz joan dadin. Zoriona ez ote da horrelako zerbait?

Besteengana irekitzen garenean, Jainkoarengana irekitzen garenean eta geure buruarekin eta mundurekin bakean eta osotasunean sentitzen garenean, ez ote da hori zoriona?

Ebanjelioko pasartea: Mt 5, 2-9

Orduan, honela hasi zitzairen irakasten: «Zorionekoak bihotzez behartsu direnak, haiek baitute Jainkoa errege. «Zorionekoak negarrez daudenak, haiek baititu Jainkoak kontsolatuko. «Zorionekoak bihotz gozokoak, haiek baitira jabetuko Jainkoak hitzemandako lurraz. «Zorionekoak Jainkoaren nahia betetzeko gose-egarri direnak, haiek baititu Jainkoak aseko. «Zorionekoak errukitsu direnak, haiek baititu Jainkoak erruki izango. «Zorionekoak bihotz-garbiak, haiek baitute ikusiko Jainkoa. «Zorionekoak bakegileak, haiek baititu Jainkoak seme-alabatzen hartuko.

Frantziskotar espiritualtasuna

«Zein da, bada, benetako poza?»

Banator Perugiatic etxera eta gau ilunean iristen naiz hona. Negua da, bazter guztiak lokatza, eta hotzaren hotzez ur jelatuzko izotz-kandelak egin zaizkit tunika-barreñetan, eta zangoetan jotzen naute etengabe, eta zaurietatik odola dario.

Eta lokatzez josia, izozturik eta hozmindurik iristen naiz ateraino eta, luzaro joka eta deika jardun ondoren, badator anaia eta galdetzen du: “Nor da?” Eta nik erantzun: “Anai Frantzisko”. Eta hark orduan: “Alde hemendik! Hau ez duk ordua bidetan ibiltzeko. Ez haiz hemen sartuko”.

Eta nik berriro eskatzean, erantzuten du: “Alde hemendik! Gizon sinple eta eskolagabe bat besterik ez haiz. Ez haiz gehiago gurekin ibiliko. Hainbeste gaituk eta halakoak, ez diagu hire beharrik”. Hala ere, nik ate ondoan jarraitzen dut eta berriro diot: “Jainkoaren maitasunagatik, har nazazue gaur gauean bederen”. Eta hark erantzun: “Ez, jauna! Hoa gurutzte-eramaileengana eta eskatu han”.

Benetan esaten dizut: pazientzia izan badut eta ernegatu ez banaiz, horretantxe datza benetako poza eta benetako bertutea eta arimaren osasuna».

Otoitza

Zorionekoak beren buruaz barre egiten dakitenak, beren dibertsioak ez du azkenik izango eta.

Zorionekoak mendi bat eta harri bat bereizten dakitenak, egoera desegoki askotatik libratuko dira eta. Zorionekoak aitzakia bila ibili gabe atsedean hartzen eta lo egiten dakitenak, jakintsu izatera helduko dira eta. Zorionekoak aditzen eta isiltzen dakitenak, gauza berriak ikasiko dituzte eta. Zorionekoak besteen eskakizunei adi dau-denak ezinbesteko sentitu gabe,

poz-iturri izango dira-eta.

Zorionekoak zuek, gauza txikiak seriozki eta inportanteak lasaiki begiratzen dakizuenen, bizitzan urruti helduko baitzarete. Zorionekoak irribarre bat estimatzen eta mespretxu bat ahazten dakizuenen, zuen bidea eguzkiz betea egongo baita. Zorionekoak egin aurretik pentsatzen eta pentsatu aurretik errezatzen duzuenen, tentelkeria asko saihestuko baitituzue. Zorionekoak zuek, batez ere, topatzen duzuen edonorengan Jauna ikusten duzuenen, egiazko argia eta egiazko jakituria aurkituko baituzue.

Gutuneko azken hitzak

"Bizi dugun zorientasuna emandako maitasunaren ondorioa da" (Isabel Allende)

2016ko azaroko eguneroko Ebanjelioa

Egunero Ebanjelioa irakurri nahi duten lagunek, egun bakoitzari dagozkion irakurgaien arabera, hemen dauzkate azaroko erreferentzia guztiak:

1 Mt 5, 1-12	7 Lk 17, 1-6	13 Lk 21, 5-19	19 Lk 20, 27-40	25 Lk 21, 29-33
2 Jn 11,17-27	8 Lk 17, 7-10	14 Lk 18, 35-43	20 Lk 23, 35-43	26 Lk 21,34-36
3 Lk 15, 1-10	9 Jn 2, 13-22	15 Lk 19, 1-10	21 Lk 21, 1-4	27 Mt 24, 37-44
4 Lk 16, 1-8	10 Lk 17, 20-25	16 Lk 19, 11-28	22 Lk 21, 5-11	28 Mt 8, 5-11
5 Lk 16,9-15	11 Lk 17,26-37	17 Lk 19, 41-44	23 Lk 21, 12-19	29 Lk 10, 21-24
6.Lk 20,27-38	12 Lk 18, 1-8	18 Lk 19, 45-48	24 Lk 21, 20-28	30 Mt 4, 18-22

Azaroko Otoitza hilaren 24an izango da.

Geure web gunea bisitatu

www.asissarea.org




Asis Sarea

646 21 48 96